

„Su schwätze mir“

Medalljongs

*Fuffzisch Johr die sein em Leewe
Offtakt fier e scheen, gruß Fest.
Drauß kann mer en „Partie“ geewe,
oder och Dehaim em „Nest“.*

*Kainer läßt sich do geer lompe,
gricht die Kass' dobei e Loch,
gieht mer an dä grüße Klompe,
dä mer vurher hat verstoch.*

*Neulich hat vom Schang dat Lißje
ons zom Fuffzischste gelad'
„Metbrenghel“ Begreßungsküßje,
wor die ierschte goode Tat.*

*Dann wurd Sekt em Stinn gesöffelt,
„Mischsalat“ gof et om acht,
später wurd die Sopp gelöffelt,
alles wor met Lieb' gemacht.*

*Krombiere, feine Gemeesjer,
„Medailloins“ von Wutz on Rend,
och Krokettcher, dölle Sößjer
Nohdesch, dä net jeder kennt.*

*Annerdaachs setzt dä klain „Stutze“
ons met Froche onner Druck:
„Medalljongs“ vom Rend on Wutze,
wie kimmt su e Veeh an Schmuck?*

Katharina Schaaf, Koblenz

18. 1. 1990 Kath. Schaaf